

GAL - Tolysh Bible
BƏ QALATIYƏVIJON
Pauli bə Qalatiyəviyon Nomə
Qalatiyə
Qal.

PAULI BƏ QALATIYƏVIJON NOMƏ

VƏSƏ

Pauli nıvıştə ın nomə bə Qalatiyə imoniyon vıǵandə bıə. Qalatiyə Asiyədə bıə Romə viloyəton qıləyniye. Çe nomə əsos movzu əve ki ğeyri-yəhudiyon Rəbb İsa Məsihi bənə ıştə Xiloskori ğəbul kardeədə əvon bə Tovrati ğanunon əməl kardəninin, ya ne. Paul sıbut kardeydə ki, de Ğanuni bəroət səy əbini. Əv nıvışteydə ki, de Məsihi bə ico bıə jimon əncəx bə imoni əsosin bənine. Əmma Qalatiyədə bıə imoniyə icmon kali qılən bə Pauli vəynə beşən, tələb kardəşone ki, de Xıdo rostə mınosibətədə beyro bə Tovrati əməl kardey ləzime.

Pauli bəvon nomə nıvışte məǵsədən, de jıqo duyəvoje təlimon ıştə roy dəqijniyə imoniyon bə rostə ro okırniyebe. Paul həməni ıştə huǵuǵon mıdofie kardeydə iyən nıvışteydə ki, Xıdo İştən bo ğeyri-yəhudiyon həvari beyro sədo kardəşe əv. Oxonə semonədə Paul ğeyd kardeydə ki, imoniyon jimon Məsihi imoniku hasil bıə bə mehıbbəti əsosin bənine.

Kitobi məzmun

1:1-10 Səlonon iyən nomə məǵsəd
1:11–2:21 Pauli bənə qıləy həvari bıə səlohiyə
3:1–4:31 Şoyə Xəbə çe Xıdo lutfə
5:1–6:10 Məsihi doə ozodəti iyən məsuliyə
6:11-18 Oxonə nəsyəton iyən səlonon

1

¹ İsa Məsihi həvari bıə az Pauliku səlonon bıbu bə Qalatiyə imoniyon icmon! Az de insonon ğərori iyən de odəmon vositə ne, əncəx de İsa Məsihi iyən Əy mardon arədə bəyji kardə de Pıə Xıdo vositə həvari təyin kardə bıəm. ² Demı iyo ivirədə bıə imoniyə boon həmməy boşmə səlonon vıǵandeydən!

³ Çəmə Pıə Xıdoku iyən Rəbb İsa Məsihiku bəşmə lutf iyən sulh bıbu! ⁴ Məsih deçəmə Pıə Xıdo irodə bəçəmə qınonro İştəni ğırbon kardışe ki, əməni çı esətnə şərə dınyoku ozod bıə. ⁵ Bə Xıdo zoləti izzət bıbu! Amin.

Co qıləy şoyə xəbə ni

⁶ Az hədəyon bəm ki, boçi şımə jıqo rəyrə tərğ kardəyone de Məsihi lutfi şıməni dəvət kardə Xıdo, bə konsə co qıləy şoyə xəbə tərəf qardeydəşon. ⁷ Əmma co şoyə xəbə ni! Kali odəmon hestin ki, piyeydəşone şıməni dəqijnın iyən Məsihi barədə Şoyə Xəbə dəqiş bıken. ⁸ Əmma bəçəmə bəyon kardə Şoyə Xəbə zidd co qıləy xəbə bəşmə rosniyəkəs bıbo, qirəm əmə ıstənən bıbomon, yaan osmoni mələkən bıbo, lənət bıbu bəy! ⁹ İştə sıftə votəy esət ijən voteydəm, har kəs ki şımə ğəbul kardə bə Şoyə Xəbə zidd bıəy bəyon kardeydəbu, lənət bıbu bəy! ¹⁰ Esət az bo insonon, yaan bo Xıdo məmnun karde nəveydəm? Yaan insonon rozi haşte piyeydəme? Qirəm az hələ insonon rozi haştey piyəmbəy, Məsihi ğul nəbim.

Pauli bənə qıləy həvari bıə sələhiyə

¹¹ Çımı imoniyə boon, az piyeydəme şımə bızınən ki, çımı bəşmə bəyon kardə Şoyə Xəbə insoniku ni. ¹² Oxo az insoniku səmni əv iyən insoni omutəşni əv bəmı. De İsa Məsihi vəhyi vositə əv bəmı oşko kardə bıə.

¹³ Həlbəttə, şımə məsəone ki, az bə Yəhudi dini etiğod kardə vaxtonədə çoknə jimon kardəmbe. Az deştə həmə zuy təğib iyən məhv kardeydəbim bə Məsihi imon varda Xıdo icmo. ¹⁴ Çımı həmvətənon arədə bə Yəhudi dini etiğod kardə ıştə həmsinon veynisə bənav bim, xısusən az çəmə dədə-bobon adət-ənənon ğıryəti kəşeydəbim.

¹⁵ Əmma hələ çımı moə bətno mını səçın kardə, Deştə lutfi sədo kardə Xıdo ¹⁶ oşko kardışe bəmı İştə Zoə. Əmr kardışe ki, Çəy həxədə Şoyə Xəbə bə co milləton bəyon bıkəm, bəvədə az hiç qıləy insoniku məsləhat nısəme. ¹⁷ Həttə bə Yerusəlim, çımısə bənav həvari bıə çə odəmon tonə nışim, əmma şım bə Ərəbiston, çəyoən oqardim bə Dəməşğ.

¹⁸ Əncəx se sori bəpeştə az oməym bə Yerusəlim ki, bıvındım Kefa, ^a təxminən ponzə ruj mandim çəy tonə. ¹⁹ Az nıvındime co həvariyon, əncəx Rəbbi boə Yağubi vındime. ²⁰ Çımı bəşmə nıvıştə harçi xalis həğigəte, Xıdo şoyde bimi! ²¹ Çəyo az dəro qınim bə Suriyə iyən Kilikiyə viloyəton. ²² Yəhudəyə viloyətədə bıə Məsihi icmonədə hiçki mını şəxsən zıneydənibe. ²³ Əvon çımı həxədə əncəx ımı zıneydəbin: «Vaxt hestbe əməni təğib kardəkəs ıştə navko məhv kardə imoni esət vəz kardeydə». ²⁴ De jıqoy əvon bəçımı qorə bə Xıdo həmd kardeydəbin.

2

Co həvariyon Pauli xıdməti təsdiğ kardeydən

¹ Çəyo çordə sori bəpeştə, az de Barnaba ijən oməymon bə Yerusəlim, Titiyən peqətimone deştə. ² Az Xıdoku vəhy səme ki, əyo şəninim. Bəvədə az co milləton arədə Şoyə Xəbə vəz kardeydəbim, bə etiboynə odəmon şəxsən ovardıme ki, bıvındım çımı sıftədə iyən esətnə kəşə zəhmət hədəre ni. ³ Demı bıə Tit Yunan bıboən hiçki məcbur nıkardışe əv sınıtə bıbu. ⁴ Bəçəmə arə bənə cəsusi niyoni dəfirsiyə boon rost kardışone ın məsələ. Əvon de Məsih İsa vositə çəmə molik bıə ozodəti həxədə de aldi

^a**1:18** *Kefa* – arami zıvonədə həvari Peteri nome.

jiçiy umute iyən əməni bo ğul bey oqordıniye məğsədi bəmə umuj qınıyəbin. ⁵ Əmma əmə hiç i ləzən tabe nıbimon bəçəvon təzyiği ki, çe Şoyə Xəbə həğiği mənə oqətəmon boşmə.

⁶ Hətto im etiboynə odəmonən tələb nıkardeşone çımıku hiçi, sıvoy çımı vəz kardə Şoyə Xəbə. Əvon ki beydən bıbun, bomı vocib ni. Xıdo insonon arədə tərəfkeşəti nıbəka. ⁷ Bərəks, əvon vındışone ki, Xıdo bəmı asbardəşe Şoyə Xəbə bə sınıt nıbə co milləton bırosnım, çoknə ki bə Peteri asbardəşbe bə sınıt bıə Yəhudiyon bırosnı. ⁸ Oxo Xıdo ğudrət doşe bə Peteri Yəhudiyon dılədə bo xıdmət karde, bəmınən ğudrət doşe co milləton dılədə bo xıdmət karde. ⁹ İmoniyon icmo rəhbəron Yağub, Peter, yəni Kefa iyən Yəhya bəmı lutf kardə bıə həvariyyəti xıdməti təsdiğ kardışone. Əvon həmko ğəzinə ğəbul kardışone mını iyən Barnaba ki, əmə bo xıdmət karde bə co milləton dılə, əvon isə bə Yəhudiyon dılə bışun. ¹⁰ Əncəx iqlə çiy xahiş kardışone çəmaku, beçizon ıştə yodo benikəmon, azən ımı de xısusı ciddi-cəhdi bə vırə rosneydəm.

Peter dıdiməti kardeydə

¹¹ Əmma Peter bə Antioxiyə omeədə az bərmalə bəçəy vəynə beşim, çumçiko əv taxsırkorbe. ¹² Yağubi tonə bıə kali odəmon nıomə Peter de co milləton hardıhəş kardeydəbe. Həmonə odəmon ome bəpeştə əv sınıtəti tərəfdoronku tarsəy esiyəy co millətonku. ¹³ Mandə Yəhudiyonən bənə bəy dıdiməti kardışone. Hətto Barnabən bəçəvon təsiri ji eqıniye. ¹⁴ Əve az vındeədə ki, əvon bə Şoyə Xəbə həğiğəti mıvofiğ hərəkət kardeydənın, az har kəsi huzurədə bəyon kardıme bə Kefa: «Qirəm tı, Yəhudi be-be bənə Yəhudi ne, bənə ğeyri-yəhudi jiyeydəşbu, boçi ğeyri-yəhudiyon məcbur kardeydəş ki, əvon bənə Yəhudi jimon bıkən?»

Əncəx bə İsa Məsihi imon vardey bə insoni bəroət doydə

¹⁵ Əmə movardo Yəhudimon, co millətono bıə «qınokoron» nimon. ¹⁶ Əmma əmə zıneydəmon ki, inson bə Ğanuni rioyət kardeydə ne, əncəx bə İsa Məsihi de imon vardey bəroət səydə. Əve əmə bə İsa Məsihi imon vardımone ki, bə Ğanuni rioyət kardey ne, bə Məsihi vardə imoni hımhımbədə bəroət bıstənəmon, çumçiko hiç kəs de Ğanuni rioyət kardey bəroət səy əzını. ¹⁷ Qirəm əmə, ıştə bəroəti Məsihi hımhımbədə bıvındomon, oşko bəkardemon ki, əmənen Ğanuni nəzərədə hejo jəqo qınokoronimon, çımı mənə ıme ki, yəne Məsihən dastək doydə bə qıno? Əslo ne! ¹⁸ Qirəm az ıştə navko imtino kardəy dəmandom bo ğəbul karde, demiyən nişo bədom ki, Ğanuni dəqordıneydəm. ¹⁹ Az de Ğanuni vositə mardim, Ğanuni hıkmıku ozod bim ki, bo Xıdo jıye bıznım. Az de Məsihi bə ico bə çomex kəşə bim, ²⁰ həni az jiyeydənim, Məsih bəmınədə jiyeydə. Çanə ki az bı andomədə jimon kardeydəm, mını piyə iyən bəçımı xoto İştəni ğırbon doə bə Xıdo Zoə vardə imoni hımhımbədə jiyeydəm. ²¹ Az çe Xıdo lutfi rədd kardeydənım! Oxo ehanə Ğanuni bəroət doy zınəşbəy, bəvədə Məsih hədəərə mardə.

Ğanun, yaan imon

¹ Ha beağılə Qalatiyəvijon, ki dəqijnişe şımə? Az boşmə jıqo oşko qəp jəme ın Xəbə ki, jıqo bızın İsa Məsih şımə çəşi vədə bə çomex kəşə be! ² Əncəx şıməku iqlə çiy parse piyeydəme: şımə çoknə səyone Ruf, bə Ğanuni əməl kardeyro, yaan Şoyə Xəbə məseədə imon vardeyro? ³ Məqəm şımə jəqo beağılışon ki, ıştə de Rufi təsiri bino kardəy deştə cisoniyə cəhdon sə kardeydəşon? ⁴ Yaanki şımə hədəərə vırədə anə əzyət kəşəyone? Be əzini ki, imon həmməy hədəərə bin. ⁵ Məqəm Xıdo bəşmə Ruf doəşe iyən şımə arədə mecuzon nişo doydə bə səbəb ki, şımə bə Ğanuni əməl kardeyron, yaan şımə bəştə məsə Şoyə Xəbə imon vardəyone?

⁶ Çoknə ki, «İbrahimi bə Xıdo imon vardışe, Xıdo saleh hisob kardışe əv». ⁷ Esət şımə imi zınənişon ki, imon vardəkəson İbrahimi fərzəndonin. ⁸ Mığəddəsə Nıvıştəyədə votə beydəbe ki, Xıdo bə co millətonən bəçəvon imoni mığobilədə bəroət doydə. Xıdo sıftəku bə İbrahimi Şoyə Xəbə bəyon kardışe, votışe: «Deştı vositə həmə xəlğon xəy-dıvo bəsten». ⁹ De jıqoy bə Xıdo imon vardəkəson, de imon varda İbrahimi bə ico xəy-dıvo bəsten.

¹⁰ *Bə Ğanuni əməl karde əsosin bəkəson lənəti jiyədən, çumçıko Mığəddəsə Nıvıştəyədə votə beydə: «Ki Ğanunədə bə nıvıştə bıə har çiy əməl kardeydəni iyən əy təsdiğ kardeydəni bəy lənət bıbu». ¹¹ İyən hiçki de Ğanuni vositə Xıdoku bəroət səy əzini, oxo «salehə odəm de imoni bəjiye». ¹² Ğanun isə bə imoni əsosin beydəni. Əmma «Ğanuni həmməyəvo bə vırə rosniyəkəs, Ğanuni hımhımbədə bəjiyey».

¹³ Məsihi peroxnişe əməni Ğanuni dəqordıniye lənətiku, Əy gəbul kardışe lənət çəmə əvəzi, çumçıko jıqo votə bıə: «Bə dor kəşə bıə odəm lənətmande». ¹⁴ İmon həmməy bəçəyro bin ki, bə İbrahimi vəd kardə bıə xəy-dıvo de İsa Məsihi vositə bə co milləton həmməy doə bıbu iyən əmənen bəmə vəd kardə bıə Rufi de imoni vositə bıstənəmon.

Ğanun ləğv karde əzini Xıdo vədi

¹⁵ Çımı imoniyə boon, jimono misal kəşeydəm: hətto insoni təsdiğ kardə vəsyətnomə hiçki ləğv karde əzini, yaan bəy jıçiy əlovə karde əzini. ¹⁶ Bə İbrahimi iyən bəçəy varisi esə boy Xıdo vəd doəşbe. Dığğət bıkən, nıvıştə bıəni «varison», nıvıştə bıə «bəştı varisi», iyo i kəsi həxədə jıqo votə beydə, ımən Məsihe. ¹⁷ Demiyən az vote piyeydəme: çosa si sori bəpeştə doə bıə Ğanun, Xıdo təsdiğ kardə vədi ləğv karde əzini. ¹⁸ Qirəm irs bə Ğanuni əsosin bəbe, bəvədə əv həni bə vədi əsosin bey nəzni, əncəx Xıdo Deştə lutfi, bə İbrahimi de vədi vositə irs doşe!

¹⁹ Jəqobu, bəvədə Ğanun bo çičiyə? Ğanun doə be ki, qınon bə oşko bekə. Əv detobə bə vaxti gıvvədəbe ki, bə vədi aid bıə Varis oməy beşe. Ğanun de mələkon iyən de qıləy vositəkorı vositə doə be. ²⁰ Vositəkor dı tərəfi arədə lozime, əmma Xıdo bə İbrahimi vəd doədə vositəkor lozim nıbe!

Çe Ğanuni məğsəd

²¹ Jəqobu, Ğanun bə Xıdo vədon ziddə? Əslo ne! Qirəm bo jimon doy ğadir bıə qıləy Ğanun doə bəbe, həlbəttə ki, de Ğanuni bəroət səy əbi. ²² Əmma Mığəddəsə Nıvıştəy bəyon kardeydə ki, har kəs çe qıno hıkmı jiyədəy. Əve vəd əncəx bə İsa Məsihi de imon vardey vositə doə beydə iyən bə imon vardəkəson doə beydə.

²³ Çanə ki ın imon omənıbe, əmə Ğanuni nəzorəti jiyədə həbs kardə bıəbimon, detobə imoni oşko bey. ²⁴ Jıqonə, Ğanun əməni bə Məsih vardə tərbiyəkə be ki, əmə de imoni bəroət bıstənəmon. ²⁵ Əmma keynə ki imon oməy rəsey, əmə həni çe tərbiyəkəy nəzorəti jiyku beşimon.

²⁶ Şımə həmməy bə İsa Məsihi bıə de imoni vositə Xıdo fərzəndonişon. ²⁷ Oxo şımə de Məsihi vəhdətədə vəftiz beədə de Məsihi i bişon. ²⁸ Həni çe Yəhudi iyən Yunani, ğuli iyən ozodi, merdi iyən jeni arədə fərgə ni, şımə həmməy de İsa Məsihi vəhdətədəşon. ²⁹ Madəm ki şımə bə Məsihi aidışon, bəvədə bızınən ki, şımə İbrahimi nəsiloyon, vədi varisiyon.

4

Əmə ğul nimon, əmə fərzəndimon

¹ Boşmə qıləyən misal bıkəşım: çanə ki varis əğile, ğuliku hiç fərgış ni. Əv çe har çiy soyb bəbe, ² detosə çəy pıə təyin kardə vaxti əv çe ğəyyumon iyən idorəkoron nəzorəti jiyədə beydə. ³ Əmənen jəqo: çanə ki ruhən əğılbimon, bə dınyo ğaydon əsiri eqıniyə ğulbimon. ⁴ Əmma təyin kardə bıə vaxt dameədə Xıdo vığandışe, jeni zandə, Ğanuni hıkmı jiyədə bə dınyo omə İştə Zoə ki, ⁵ Ğanuni hıkmı jiyədə bıəkəson ozod kardeyro bıhırı iyən əməni bə fərzəndəti peqətı. ⁶ Şımə fərzənd beyro, Xıdo İştə Zoə Rufi vığandışe bəşmə dilon, ə Ruf ki, Pıə ğəzinə ovardışe Bəy: «Abba!» ⁷ Əve ki tı həni ğul niş, tı fərzəndiş. Madəm ki tı fərzəndiş, Xıdo varis kardışe tı.

Paul bo Qalatiyəvijon norohat beydə

⁸ Keynəsə şımə, Xıdo zıneydənişon hələ, əslədə hiç xıdo nıbə «xıdon» ğulbişon. ⁹ Əmma esə, keynə ki zınəone Xıdo, həniyən rosti Xıdo zınəşe şıməni. Jəqo beədəsə şımə piyeydəone ijən oqardən bı bezuyə iyən bedəqərə dınyo ğaydon, piyeydəone ijən çəvon ğul bıbən? ¹⁰ Şımə bə konsə xısusiyə rujon, manqon, semonon iyən soron rıoyət kardeydəşon! ¹¹ Tarseydəm ki, çımı deşmə kəşə zəhmət hədəərə bışu. ¹² Çımı imoniyə boon, lovəmandim bəşmə, bənə bəmi ozod bıbən! Oxo azən bənə bəşmə bim. Şımə bəmi hiç qıləy bevəci kardəyonni.

¹³ Şımə zıneydəşon ki, az iminə kərə şımə tonə omeədə cismən zəif beədə rosnime bəşmə Şoyə Xəbə. ¹⁴ Əmma çımı cisoni vəzyəti onıpırtınışe şıməni çımıku. Şımə rədd nıkardıone mını, ğəbul kardıyone Xıdo qıləy daynə ğəzinə, İsa Məsihi ıştəni ğəzinə. ¹⁵ Bəs çune şe şımə ə şoyvo? Az yəğın zıneydəm, şımə bəvədə hozıbişon, şayət mımkun bəbəy ıştə çəşonən ədeyon bəmi! ¹⁶ Bəs çiç be, az bə səbəb şımə deşmen bim ki, bəşmə həğigəti voteydəm? ¹⁷ Ə odəmon ki cəhd kardeydən şıməni bəştə tərəf okırın, çəvon niyət çok ni, əvon piyeydəşone əməni esındının ki, peşo şımə çəvon tərəfdor bıbən. ¹⁸ De çokə niyəti bıbo, çokə koon kardeyro cəhd kardey

çoke, imi hejo kardey lozime, əncəx az şimə tonə beədəsə ne. ¹⁹ Ha çımı fərzəndon!
Az ijən de əzob-əzyəti boşməno zande doji kəşeydəm detosə bə vaxti ki, şimə bə
Məsihi oxşəş bıdən! ²⁰ Qirəm esə az şimə tonə bəbəym! Bəvədə az əznim ki, de kon
toni qəp əjənim deşmə, əmma bəşmə bı holi mot mandəm.

Sara iyən Həcəri nımuna

²¹ Ha Ğanuni hıkmı jiyədə jiyə piyəkəson, bəmi bıvotən bunum, şimə sərəseydəşon
ki, Ğanun çiç voteydə? ²² *Oxo nıvıştə bıə ki, İbrahimi hestışbe dıqlə zoə. Qıləyni
cariyəo, ə qıləyni ozodə jeno. ²³ Çe cariyə zoə insoni orzuku moəo be, əmma ozodə
jeni zoə bə Xıdo vədi nıvofıǵ moə be. ²⁴ İyo məcazi məno heste: im dıqlə jen dıqlə
Əhdi təmsil kardeydə. Çəvon qıləyni Sina bandoye, bo ğul bey əǵıl zandeydə. Im
Həcərə. ²⁵ Həcər Ərəbıstonədə bıə Sina bandi təmsil kardeydə, həmçinin bə esətnə
Yerusəlimi nıvofıǵ omeydə, Həcər deştə fərzəndon bə ico ğulətiyədən. ²⁶ Əmma
osmoni Yerusəlim ozode. Çəmə moə əve! ²⁷ Oxo Mıǵəddəsə Nıvıştəyədə nıvıştə bıə:

«Şoyvo bıkə, ha besonə iyən siyənə jen!

Hay bıdə iyən şotkomə bıkə, ha zande doji nıznə jen!

Tərq kardə bıə jeni fərzəndon veyin

Şusoybə jeni fərzəndonsə!»

²⁸ Çımı imoniyə boon, şimənən bənə İsaǵı, de vədi vositə fərzənd bışon. ²⁹ Əmma
çoknə ki bəvədə insoni orzuku bə dınyo omə əǵıl, de Rufi ğıvvə bə dınyo omə əǵılı
təǵib kardeydəbe, esətnə jəqoye. ³⁰ Bəs Mıǵəddəsə Nıvıştəyə çiç voteydə? «Bıtojin
cariyə deçəy zoə ki, cariyə zoə de ozodə zoə bə ico varis əbini». ³¹ Əve ha boon, əmə
çe cariyə fərzənd nimon, əmə ozodə jeni fərzəndimon!

5

Məsihi doə ozodəti

¹ Məsih əməni ozod kardışe ki, əmə ozod bıbəmon. Jıqonə, in ozodəti nıǵo bıdən,
ıştəni ijən bə ğuləti şomədən!

² Quş bıdən, az Paul voteydəm bəşmə: qirəm şimə mıtləǵ sınıtə bıboşon, Məsihi
boşmə hiç foydə əbini. ³ Az ijənən çəşnavi kardeydəm bə sınıtə bıə har odəmi ki, əv
bə Ğanuni həmməy əməl kardənine. ⁴ De Ğanuni vositə bəroət səy piyəkəson, şimə
Məsihiku co bışon, lutfiku məhrum bışon. ⁵ Oxo əmə umudəvomon ki, de Rufi vositə,
de imoni Xıdoku bəroət bəstemon. Əmə de həsrəti bə çəşimon. ⁶ De Məsih İsa imonbu,
fərgış ni, sınıtə kardə bıəmon, ya ne. Vocib bıəy de mehıbbəti fəol bıə imone.

⁷ Şimə çok bə nav şeydəbiyon. Oxo ki bə həǵıǵəti itoət kardeydə bəşmə pojənəti
kardışe? ⁸ Şiməni dəqijnişone, im həǵıǵəte ki, şiməni sədo kardə Kəsi nıkardışe im.
⁹ «Kamışi həmyoz həmə həmi tırşovneydə». ¹⁰ De Rəbbi vositə az bovə kardeydəm
bəşmə: çəmə arədə mınəoqışə əbini! Əmma harki şiməni dəqijneydəbo, ki beydə bibu,
ıştə cəzo bəkəşe. ¹¹ Çımı imoniyə boon, qirəm az hələn sınıtəti vəz kardeydəmbo, boçı

* 4:22 Ofə.16:15; 21:2-3

hələn mini təğib kardeydən? Jəqo bəbe ənqəl bıə çomexən ləğv kardə əbi. ¹² Bə şıməni dəqijniyəkəson məsləhat zıneydəm ki, ıştəni sınıət ne, qırd bıbırnı!

Mığəddəsə Rufi rəhbərəti jiyədə bıə jimon

¹³ Çımı boon, şımə bə ozodəti sədo kardə bıəşon. Əmma, diyəkən ozodəti vonə nıbu boşmə cisoni təbiəti! Bərəks, de mehıbbəti xıdmət bıkən bə iyəndı! ¹⁴ Həmə Ğanun iqlə ifodədə xulasə beydə: «Bənə ıştəni bıpiy ıştə hamsiyə». ¹⁵ Ehanə iyəndı bıcuyon iyən pıtıpoə bıkon, diyəkən, ıştəni tələf məkənən!

¹⁶ Əve az bəşmə voteydəm: Mığəddəsə Rufi hamyəy ğəzinə jimon bıkən, bəvədə şımə bəştə cisoniyə ehtiroson əsir enıbəqıneşon. ¹⁷ Cisoni təbiəti piyəyon bə Rufi vəynən, Rufi piyəyon isə bə cisoni təbiəti vəynən. Əvon hejo bə iyəndı vəynə beşeydən ki, səkıştədə şımə ıştə piyəy kardeydəniyon. ¹⁸ Əmma Ruf şıməni idorə kardeydəbu, bəvədə Ğanuni nişə şımə səpe hiç qıləy hakimiyət.

¹⁹ Cisoniyə təbiəti əməlon bəllin: beəxloğəti, nopokəti, cinsiyə dəqardəti, ²⁰ bıtpərəstəti, sehrbozəti, deşmenəti, rıxnə, rıvınəti, ğəzəbnokəti, taməkorəti, mınəqışə, mərəşulə, ²¹ pəxıləti, sərxoşəti, əyyoşəti iyən jıqo-jıqo çiyon. Az çəşnavi kardəmbə şımə navko, esət ijənən xəbədo kardeydəm: jıqo əməlon kardəkəson hiç qıləyni Xıdo Podşoəti irs səy əzını.

²² Rufi bəhrə esə boy ıme: mehıbbət, şoyvo, sulh, səbr, xəymandəti, səxaynəti, bəfomandəti, ²³ həliməti, nəfsi oqətey. Jəqo qıləy ğanun ni ki, bımon vəynə beşu. ²⁴ Ə şəxson ki bə İsa Məsihi məxsusin, bə çomex kəşəşone ıştə cisoni təbiət deştə ehtirosi iyən orzuyon bə ico. ²⁵ Madəm ki Ruf əməni idorə kardeydə, boən bə Rufi mıvofığ jimon bıkəmon! ²⁶ Şənboz məbəmon, iyəndı rıkno məkəmon, bə iyəndı pəxıləti məkəmon!

6

Har kəs bəştə rəsə şələ kırıniyənine

¹ Çımı imoniyə boon, qirəm kiysə qıləy taxsırısə qətə bıəbo, ruhən ğıvvəyn bıə şıməhon həlim-həlimi islo kardənişon əy. Həməni sərhısob bıəniniş ki, tı ıştən dəniqiji! ² Bə iyəndı çətinətiyonədə koməqəti bıkən, jıqonə şımə Məsihi ğanuni icro bəkaşon. ³ Qirəm kiysə ıştən qıləy hiç be-be ğuddə kardeydəbu, demiyən əv ıştən-ıştəni bə dast dəğandeydə. ⁴ Jəqobu, bıdə har kəs ıştən ğıymət bıdə bəştə əməlon, bəvədə əv deştə əməlon fəxr karde bəzıne iyən ıştəni de co kəson mığoyisə əkəni, ⁵ oxo har kəs bəştə rəsə şələ kırıniyənine.

⁶ Bəki kəlom omutə beydəbu, bıdə əv de omutəkəsi har curə neməti baxş bıkə.

⁷ ıştəni bə dast dəmənen: Xıdo bə dast dənoy ğeyri-mımkune! İnsən çıç bıkaşto, əyən bədıve! ⁸ Bəştə cisoni təbiəti xoto kaştəkəs çəyku marde bədıve, bə Rufi xoto kaştəkəs Rufiku zolə jimon bədıve. ⁹ Jəqobu, çoki kardeydədə sıst məbəmon! Əmə həvəsi nıqınomon, vaxtədə məhsuli bədıvemon. ¹⁰ Əve çanə ki vaxt heste, çoki bıkəmon, xısusən bə imoniyon icmo.

Oxonə nəsyəton iyən səlomon

¹¹ Esə az deştə ıştən dasti, de yolə hər fon nıvıştıme bəşmə. ¹² Ə odəmon ki piyeydəşone bə odəmon xoş bon, əvon şıməni bo sinnət bey məcbur kardeydən. Əvon piyeydəşonni ki, əvoni bə Məsihi çomexi imon vardeyro təğib bıkən. ¹³ Sinnət bəkəson ıştənən bə Ğanuni əməl kardeydən, əmma piyeydəşone şıməni sinnət bıkən ki, bo şəhn kardeyro səbəb bıbuşone. ¹⁴ Əmma az piyeydəməni de hiçi şəhn bıkəm, az əncəx de Rəbbi çomexi şəhn kardeydəm, bəçəy hisob dınyo bomı bə çomex kəşə bıə, azən bo dınyo bə çomex kəşə bıəm. ¹⁵ Oxo çı fərğış heste, tı sinnət bıəş, ya ne. Vocib bıəy ıme: tı bo Xıdo tojə inson bıəş, ya ne? ¹⁶ Bı ğaydə çanə rioyət kardəkəson hestinbu, çəvon səpe, çə Xıdo İsraili xəlği səpe sulh iyən mərhəmət bo! ¹⁷ Bıdə jıqoşə hiçki həni bəmi əzyət nıdə. Həni bomı vəse ki, az bə İsa xoto sə yarə rizon ıştə andomədə kırneydəm. ¹⁸ Çəmə Rəbb İsa Məsihi lutf deşmə bıbu! Amin.